


目101

829.3

:29



經義考卷一百七十二

秀水 朱彝尊 編



男 昆田 校

春秋 五

北海王劉睦春秋旨義終始論

佚

後漢書北海敬王睦少好學博通書傳光武愛之顯宗在東宮尤見幸待入侍諷誦出則執轡中興初禁網尚濶而睦性謙恭好士千里交結自名儒宿德莫不造門由是聲價益廣永平中法憲頗峻睦乃謝絕賓客放心音樂然性好讀書常為愛玩能屬文作春秋旨義終始論

陳氏元春秋訓詁

佚

後漢書陳元字長孫蒼梧廣信人少傳父業為之誡詁鏡
精覃思至不與鄉里通建武初與桓譚杜林鄭興俱為學
者所宗帝立左氏學太常選博士四人元為第一
陸德明曰司空南閣祭酒陳元作左氏同異

鍾氏興春秋章句

佚

後漢書鍾興字次文汝南汝陽人少從少府丁恭受嚴氏
春秋恭薦興學行高明光武召見拜郎中稍遷左中郎將
詔令定春秋章句去其復重以授皇太子又使宗室諸侯
從興受章句

孔氏奇春秋左氏刪一名左氏
傳義詰

三十一卷

佚

後漢書孔奮字君魚扶風茂陵人少從劉歆受春秋左氏
傳歆稱之弟奇博通經典作春秋左氏刪

連叢子序曰先生名奇字子異其先魯人褒成君之後也
兄君魚王莽末避地大河之西以論道為事是時先生年
二十一矣每與其兄論學其兄謝服焉及世祖即阼君魚
乃仕官至武都太守關內侯以清儉聞海內先生雅好儒
術淡忽榮祿不願從政遂刪撮左氏傳之難者集為義詰
發伏闡幽讚明聖祖之道以祛學者之蔽著書未畢而早
世不永宗人子通痛其不遂惜茲大訓不行於世乃按其
篇目各如本第并序答問凡三十一卷將來君子儻肯游

息幸詳錄之焉

孔氏嘉左氏說

佚

後漢書孔奮晚有子嘉官至城門校尉作左氏說

陸德明曰侍中孔嘉字山甫扶風人

鄭氏興春秋條例章句訓詁

佚

後漢書興少學公羊春秋晚善左氏傳遂積精深思通達其旨同學者皆師之天鳳中將門人從劉歆講正大義歆美興才使撰條例章句訓詁興好古學尤明左氏周官長於歷數自杜林桓譚衛宏之屬莫不斟酌焉世言左氏者多祖於興而賈逵自傳其父業故有鄭賈之學

東觀漢記興從博士金子嚴為左氏春秋

鄭氏衆春秋難記條例

七錄九卷

佚

春秋刪

本傳十九篇

佚

後漢書衆從父受左氏春秋作春秋難記條例其後受詔作春秋刪十九篇

徐彥曰鄭衆作長義十九條十七事專論公羊之短左氏之長

牒例章句

唐志九卷

佚

賈氏徽左氏條例

二十一篇

佚

後漢書賈逵父徽從劉歆受左氏春秋兼習國語周官又受古文尚書於塗暉學毛詩於謝曼卿作左氏條例二十一篇

陸德明曰徽字元伯後漢潁陰令

賈氏逵左氏傳解詁

隋志三十卷

佚

後漢書逵弱冠能誦五經兼通五家穀梁之說尹史始劉

姓于尤明左氏傳國語為之解詁五十一篇注左氏三十

篇國語二十一篇永平中上疏獻之顯宗重其書寫藏祕

館建初元年詔逵入講北宮白虎觀南宮雲臺帝善逵說

使出左氏傳大義長於二傳者逵於是摘出左氏三十事

帝嘉之令逵自選公羊嚴顏諸生高才者二十人教以左

氏與簡紙經傳各一通

春秋左氏長經

隋志二十卷

佚

徐彥曰賈逵作長義四十一條云公羊理短左氏理長

春秋釋詁

佚

春秋三家經本訓詁

隋志十二卷

佚

樊氏儵 刪定嚴氏春秋章句

佚

後漢書儵字長魚南陽湖陽人就侍中丁恭受公羊嚴氏春秋永平元年拜長水校尉二年封燕侯初儵刪定公羊嚴氏春秋章句世號樊侯學教授門徒前後三千餘人弟子穎川李修九江夏勣皆為三公

張氏霸 減定嚴氏春秋章句

佚

後漢書張霸字伯饒蜀郡成都人就長水校尉樊儵受嚴氏公羊春秋永元中為會稽太守霸以儵刪嚴氏春秋猶多繁辭廼減定為二十萬餘言更名張氏學

楊氏終 春秋外傳

十二篇

佚

後漢書楊終字子山蜀郡成都人年十三為郡小吏太守奇其才遣詣京師受業習春秋顯宗時徵詣蘭臺拜校書郎著春秋外傳十二篇改定章句十五萬言

李氏育 難左氏義

佚

後漢書李育字元春扶風漆人少習公羊春秋嘗讀左氏傳雖樂文采然謂不得聖人深意以為前世陳元范升之徒更相非析而多引圖讖不據理體於是作難左氏義四十一事建初元年舉方正為議郎後拜博士詔與諸儒論五經於白虎觀遷尚書令侍中

馬氏融

三傳異同說

佚

後漢書融嘗欲訓左氏春秋及見賈逵鄭眾注乃曰賈若精而不博鄭君博而不精既精既博吾何加焉但著三傳異同說

戴氏宏

解疑論

佚

徐彥曰何氏恨先師觀聽不決多隨二創先師戴宏等也戴宏作解疑論以難左氏不得左氏之理不能以正義決之故云觀聽不決多隨二創者背經任意反傳違戾與公羊為一創援引他經失其句讀又與公羊為一創也

何氏休

春秋公羊解詁

隋志十一卷

唐志十三卷

存

後漢書何休字邵公任城樊人父豹少府休以列卿子詔拜郎中辭病去陳蕃辟之蕃敗休坐廢錮迺作春秋解詁覃思不闕門十有七年又以春秋駁漢事六百餘條妙得公羊本意休善歷算與其師博士羊弼追述李育意以難二傳作公羊墨守左氏膏肓穀梁廢疾黨禁解拜議郎再

遷諫議大夫

休自序曰昔者孔子有云吾志在春秋行在孝經此二學者聖人之極致治世之要務也傳春秋者非一本據亂而作其中多非常異義可怪之論說者疑惑至有倍經任意反傳違戾者其勢雖問不得不廣是以講誦師言至於百萬猶有不解時加讓嘲辭援引他經失其句讀以無為有甚可閔笑者不可勝計也是以治古學貴文章者謂之俗儒至使賈逵緣隙奮筆以為公羊可奪左氏可興恨先師觀聽不決多隨二創此世之餘事斯豈非守文持論敗績失據之過哉余竊悲之久矣往者畧依胡毋生條例多得其正故遂隱括使就繩墨焉

張華曰休注公羊傳云何氏學或云休謙辭受學於師乃言此義不出於已

王嘉曰何休木訥多智三墳五典陰陽算術河洛讖緯及遠年古諺歷代圖籍莫不成誦門徒有問者則為注記而口不能說作左氏膏肓公羊墨守穀梁廢疾謂之三闕言理幽微非知幾藏往不可通焉京師謂為學海

蘇軾曰三傳迂誕奇怪之說公羊為多而何休又從而附成之

晁說之曰何休特負於公羊之學五始三科九旨七等六輔二類七缺之設何其紛紛邪既曰據百二十國寶書而又謂三世異辭何耶

陳振孫曰其書多引讖緯所謂黜周王魯變周文從殷質之類公羊皆無明文蓋為其學者相承有此說也

家鉉翁曰何休公羊傳外多生支節失公羊之本旨
呂大圭曰春秋三傳何范杜三家各自為說而說之謬者
莫如何休如元年春王正月公羊不過曰君之始年爾何
休則曰春秋紀新王受命於魯滕侯卒不名不過曰滕微
國而侯不嫌也而休則曰春秋王魯託隱公以為始黜周
王魯公羊未有明文也而休乃倡之其誣聖人也甚矣公
羊曰母弟稱弟母兄稱兄此其言已有失矣而休又從為
之說曰春秋變周之文從商之質質家親親明當親厚於
羣公子也使後世有親厚於同母弟兄而薄於父之枝葉
者未必不由斯言啓之公羊曰立適以長不以賢立子以
貴不以長此言固有據而何休乃為之說曰嫡子有孫而
死質家親親先立弟文家尊尊先立孫使後世有惑於質

文之異而嫡庶互爭者未必非斯語禍之其釋會戎之文
則曰王者不治夷狄錄戎者來者勿拒去者勿追也春秋
之作本以正夫夷夏之分乃謂之不治可乎其釋天王使
來歸弔之義則曰王者據土與諸侯分職俱南面而治有
不純臣之義春秋之作本以正君臣之分乃謂有不純臣
之義可乎隱三年春二月己巳日有食之公羊不過曰記
異也而何休則曰是後衛州吁弑其君諸侯初僭桓元年
秋大水公羊不過曰記災也而休則曰先是桓篡隱與專
易朝宿之地陰逆與怨氣所致而凡地震山崩星電雨雪
蝨螟彗孛之類莫不推尋其致變之由考驗其為異之應
其不合者必強為之說春秋紀災異而不說其應曾若是
之瑣碎磔裂乎若此之類不一而足凡皆休之妄也愚觀

三子之釋傳惟范甯差少過其於穀梁之義有未安者輒曰甯未詳蓋譏之也而何休則曲為之說適以增公羊之過爾故曰范甯穀梁之忠臣何休公羊之罪人也

黃澤曰近世說春秋謂孔子用夏正考之三傳未嘗有夏正之說何休最好異論如黜周王魯之類甚多若果用夏正則何氏自應張大其事今其釋公羊傳亦止用周正如冬十一月有星孛于東方何氏云周十一月夏九月日在房心是也程子以後學者始有用夏正之說然三傳皆用周正若用夏時則三傳皆當廢矣

春秋公羊墨守

隋志十四卷 唐志一卷高麗史十五卷

佚

春秋左氏膏肓

隋志十卷 崇文總目九卷中興書目第七卷闕

佚

崇文總目漢司空掾何休始撰答賈逵事因記左氏所短遂頗流布學者稱之後更刪補為定今每事左方輒附鄭康成之學因引鄭說竄何書云今殘缺第七卷亡

陳振孫曰何休著公羊墨守等三書鄭康成作鉞膏肓起廢疾發墨守以排之今其書多不存惟范甯穀梁集解載休之說而鄭君釋之當是所謂起廢疾者今此書並存二家之言意亦後人所錄館閣書目闕第七篇今本亦正闕宣公而於第六卷分文十六年以後為第七卷當并合其十卷止於昭公亦闕定哀固非全書也而錯誤殆未可讀

未有他本可正

春秋穀梁廢疾

隋志三卷

佚

後漢書鄭玄傳時任城何休好公羊學遂著公羊墨守左氏膏肓穀梁廢疾玄乃發墨守鍼膏肓起廢疾休見而歎曰康成入我室操我矛以伐我乎

隋志何休撰鄭玄釋張靖箋

春秋漢議

隋志十二卷

佚

春秋公羊文謚例

隋志一卷

佚

徐彥曰何氏作文謚例有五始三科九旨七等六輔一類七缺之義三科九旨者新周故宋以春秋當新王此一科三旨也所見異辭所聞異辭所傳聞異辭二科六旨也內其國而外諸夏內諸夏而外夷是三科九旨也按宋氏之注春秋說三科者一曰張三世二曰存三統三曰異外內是三科也九旨者一曰時二曰月三曰日四曰王五曰天王六曰天子七曰譏八曰貶九曰絕時與月日詳略之旨也王與天王天子是錄遠近親疎之旨也譏與貶絕則輕重之旨也宋氏此說賢者擇之可也五始者元年春王正月公即位是也七等者州國氏人名字子是也六輔者公

輔天子卿輔公大夫輔卿士輔大夫京師輔君諸夏輔京師是也二類者人事與災異是也七缺者惠公妃匹不正隱桓之禍生是為夫之道缺也文姜淫而害夫為婦之道缺也大夫無罪而致戮為君之道缺也臣而害上為臣之道缺也晉侯殺其世子申生宋公殺其世子痤為父之道缺也楚世子商臣弑其君髡蔡世子般弑其君固為子之道缺也桓八年正月己卯烝桓十四年八月乙亥嘗僖三十一年夏四月丁酉不從乃免牲猶三望郊祀不修則公之禮缺是為七缺也矣

春秋公羊傳條例

七錄一卷

佚

秋議

隋志十卷

佚

服氏 虔 春秋左氏傳解義

隋志三十一卷 唐志釋文三十卷

佚

春秋左氏膏肓釋病

隋志十卷 唐志五卷

佚

按劉昭注續漢書禮儀志引春秋釋病文曰漢家郡守行大夫禮鼎俎邊豆工歌縣

春秋漢議駁

七錄二卷

唐志十一卷

佚

春秋成長說

隋志九卷

唐志七卷

佚

春秋塞難

隋志三卷

未見

春秋音隱

唐志一卷

佚

漢南紀服虔字子慎河南滎陽人少行清苦爲諸生尤明

春秋左氏傳爲作訓解舉孝廉爲尚書郎九江太守

後漢書服虔入太學受業作春秋左氏傳解行之至今又

以左傳駁何休之所議漢事十六條中平末拜九江太守

世說鄭玄欲注春秋傳尚未成時行與服子慎遇宿過舍

先未相識服在外車上與人說已注傳意玄聽之良久多

與已同玄就車與語曰吾久欲注尚未了聽君向言多與

吾同今當盡以所注與君遂爲服氏注 又曰服虔旣善

春秋將爲注欲參考同異聞崔烈集門生講傳遂匿姓名

爲烈門人賃作食每當至講時輒竊聽戶壁閒旣知不能

踰已稍共諸生叙其短長烈聞不測何人然素聞虔名意

疑之明早往及未寤便呼子慎子慎虔不覺驚應遂相與

友善

隋書諸儒傳左氏者甚衆其後賈逵服虔並爲訓解至魏
遂行於世晉杜預又爲經傳集解服虔杜預注俱立國學
而後學惟傳服義至隋杜氏盛行服義寢微今殆無師說
北史河北諸儒能通春秋者並服子慎所注其河外諸生
俱服膺杜氏大抵河北所爲章句好尚互有不同江左左
傳則杜元凱河洛左傳則服子慎要其會歸殊方同致矣
應氏劬春秋斷獄

佚

後漢書應劭字仲遠汝南南潁人中平六年拜太山太守撰具
律本章句尚書舊事廷尉板令決事比例司徒都目五曹
詔書及春秋斷獄凡二百五十篇蠲去復重爲之節又
集駁義二十篇以類相從凡八十二事

劉氏陶春秋條例

佚

後漢書靈帝詔陶次第春秋條例

延氏篤左氏傳注

佚

陸德明曰京兆尹延篤受左氏於賈逵之孫伯升因而注
之

鄭氏分春秋左氏分野

七錄一卷

佚

春秋十二公名

七錄一卷

佚

駁何氏漢議

隋志二卷

佚

駁何氏漢議叙

隋志一卷

佚

王哲曰鄭康成不為章句特緣何氏興辭曲為一傳解紛
不顧聖人大旨

荀氏爽春秋公羊問答

七錄五卷 唐志同

佚

隋書荀爽問魏安平太守徐欽答

春秋條例

佚

後漢書爽著春秋條例又作公羊問

穎氏容春秋釋例

隋志十卷 唐志七卷

佚

後漢書穎容字子嚴陳國長平人善春秋左氏師事太尉
楊賜郡舉孝廉州辟公車皆不就初平中避亂荊州劉表
以為武陵太守不肯起著春秋左氏條例五萬餘言

孔穎達曰光武中興以後陳元鄭眾賈逵馬融延篤彭仲
博許惠卿服虔穎容之徒皆傳左氏春秋魏世則王肅董

遇為之注 又曰賴子嚴比於劉賈之徒學識雖復淺近然注述春秋名為一家

按初學記引賴氏釋例文云告朔行政謂之明堂又云周公朝諸侯於明堂太廟與明堂一體也

王氏 玠 春秋左氏達義 新唐志作達長義

七錄一卷

佚

隋書王玠漢司徒掾

彭氏 汪 左氏奇說

佚

陸德明曰汝南彭汪字仲博記先師奇說及舊片

孔氏 融 春秋雜議難

七錄五卷

佚

許氏 淑 左氏傳注解

佚

陸德明曰太中大夫許淑字惠卿魏郡人

謝氏 該 左氏解釋

佚

後漢書謝該字文儀南陽章陵人善明春秋左氏門徒數百千人建安中河東人樂詳條左氏疑滯數十事以問該皆為通解之名為謝氏釋行於世仕為公車司馬令少府孔融薦之拜議郎

段氏 肅 春秋穀梁傳注

隋志十四卷 唐志十三卷

佚

陸德明曰不知何人

隋書疑漢人

李氏謨左氏指歸

佚

華陽國志李謨字仲欽涪人為太子中庶子右中郎將著

左氏注解依則賈馬異于鄭

陸德明曰梓潼李仲欽著左氏指歸

經義考卷一百七十二終

弟子錢塘丁 晟覆校

經義考卷一百七十三

秀水 朱彝尊 編

男 昆田 校

春秋 六

魏高貴鄉公左氏音

七錄三卷

佚

陸德明曰曹髦字士彥魏廢帝

士氏朗春秋左氏傳注

隋志十二卷 唐志十卷

佚

春秋左氏釋駁

經義考 春秋

佚

董氏 遇 春秋左氏傳章句

隋志三十卷

佚

樂氏 詳 左氏問

佚

魏畧詳字文載少好學建安初聞南郡謝該善左氏傳乃從南陽步詣該問疑難諸要今左氏樂氏問七十二事詳所撰也黃初中徵拜博士

王氏 肅 春秋左氏傳注

隋志三十卷

佚

嵇氏 康 春秋左氏傳音

隋志三卷

佚

麋氏 信 春秋說要

隋志十卷

佚

理何氏漢議

隋志二卷

佚

穀梁傳注

隋志十二卷

佚

陸德明曰信字南山東海人魏樂平太守

韓氏益春秋三傳論

隋志十卷

佚

隋書魏大長秋韓益撰

曹氏耽春秋左氏音

七錄四卷

佚

孫氏炎春秋例

佚

杜氏寬春秋左氏傳解

佚

唐氏固春秋穀梁傳注

隋志十三卷

釋文序錄
十二卷

佚

春秋公羊傳注

佚

吳錄固字子正

吳志丹陽唐固修身積學稱為儒者著國語公羊穀梁傳注講授常數十人權為吳王拜固議郎黃武四年為尚書

僕射

士氏燮春秋傳注

隋志十一卷

佚

吳錄士燮字彥威蒼梧廣信人少游學京師事潁川劉子奇治左氏春秋補尚書郎遷交趾太守耽翫春秋為之注解陳國袁徽與尚書令荀彧書曰交趾士府君官事小閑輒翫習書傳春秋左氏傳尤簡練精微吾數以咨問傳中諸疑皆有師說意思甚密又尚書兼通古今大義詳備問京師古今之學是非忿爭今欲條左氏尚書長義上之其見稱之

張氏昭春秋左氏傳解

佚

吳志張昭字子布彭城人從白侯子安受左氏春秋孫策命為長史復為權長史魏封權吳王拜昭綏遠將軍封由拳侯權既稱尊號更拜輔吳將軍班亞三司改封婁侯在里宅無事乃著春秋左氏傳解及論語注

鮮于公春秋公羊解序

隋志一卷

佚

刁氏春秋公羊例序

隋志五卷

佚

杜氏預春秋左氏經傳集解

隋志三十卷

存

晉書杜預字元凱京兆杜陵人起家尚書郎拜鎮南大將

軍都督荊州諸軍事以功進爵當陽縣侯預既立功從容無事乃就思經籍為春秋左氏經傳集解又參考衆家譜第謂之釋例又作盟會圖春秋長歷備成一家之學比老乃成祕書監摯虞賞之曰左邱明本為春秋作傳而左傳遂自孤行釋例本為傳設而所發明何但左傳故亦孤行預嘗稱王濟有馬癖和嶠有錢癖武帝聞之謂預曰卿有何癖對曰臣有左傳癖

預自序曰春秋者魯史記之名也記事者以事繫日以口繫月以月繫時以時繫年所以記遠近別同異也故史之所記必表年以首事年有四時故錯舉以為所記之名也周禮有史官掌邦國四方之事達四方之志諸侯亦各有國史大事書之於冊小事簡牘而已孟子曰楚謂之檮杌

晉謂之乘而魯謂之春秋其實一也韓宣子適魯見易象與魯春秋曰周禮盡在魯矣吾乃今知周公之德與周之所以王韓子所見蓋周之舊典禮經也周德既衰官失其守上之人不能使春秋昭明赴告策書諸所記注多違舊章仲尼因魯史策書成文考其真偽而志其典禮上以遵周公之遺制下以明將來之法其教之所存文之所害則刊而正之以示勸戒其餘則皆即用舊史史有文質辭有詳畧不必改也故傳曰其善志又曰非聖人孰能修之蓋周公之志仲尼從而明之左邱明受經於仲尼以為經者不刊之書也故傳或先經以始事或後經以終義或依經以辨理或錯經以合異隨義而發其例之所重舊史遺文畧不盡舉非聖人所修之要故也身為國史躬覽載籍必

廣記而備言之其文緩其旨遠將令學者原始要終尋其
枝葉究其所窮優而柔之使自求之饜而飫之使自趨之
若江海之浸膏澤之潤渙然冰釋怡然理順然後為得也
其發凡以言例皆經國之常制周公之垂法史書之舊章
仲尼從而修之以成一經之通體其微顯闡幽裁成義類
者皆處舊例而發義指行事以正褒貶諸稱書不書先書
故書不言不稱書曰之類皆所以起新舊發大義謂之變
例然亦有史所不書即以為義者此蓋春秋新意故傳不
言凡曲而暢之也其經無義例因行事而言則傳直言其
歸趣而已非例也故發傳之體有三而為例之情有五
一曰微而顯文見於此而起義在彼稱族尊君命舍族尊夫
人梁亡城緣陵之類是也二曰志而晦約言示制推以知

例參會不地與謀曰及之類是也三曰婉而成章曲從義
訓以示大順諸所諱辟璧假許田之類是也四曰盡而不
汙直書其事具文見意丹楹刻桷天王求車齊侯獻捷之
類是也五曰懲惡而勸善求名而亡欲蓋而章書齊豹盜
三叛人名之類是也推此五體以尋經傳觸類而長之附
於二百四十二年行事王道之正人倫之紀備矣或曰春
秋以錯文見義若如所論則經當有事同文異而無其義
也先儒所傳皆不其然答曰春秋雖以一字為褒貶然皆
須數句以成言非如八卦之爻可錯綜為六十四也固當
依傳以為斷古今言左氏春秋者多矣今其遺文可見者
十數家大體轉相祖述進不成為錯綜經文以盡其變退
不守邱明之傳於邱明之傳有所不通皆沒而不說而更

膚引公羊穀梁適足自亂預今所以為異專修邱明之傳以釋經經之條貫必出於傳傳之義例總歸諸凡推變例以正褒貶簡二傳而去異端蓋邱明之志也其有疑錯則備論而闕之以俟後賢然劉子駿創通大義賈景伯父子許惠卿皆先儒之美者也未有穎子嚴者雖淺近亦復名家故特舉劉賈許穎之違以見同異分經之年與傳之年相附比其義類各隨而解之名曰經傳集解又別集諸例及地名譜第歷數相與為部凡四十部十五卷皆顯其異同從而釋之名曰釋例將令學者觀其所聚異同之說釋例詳之也或曰春秋之作左傳及穀梁無明文說者以為仲尼自衛反魯修春秋立素王邱明為素臣言公羊者亦云黜周而王魯危行言孫以辟當時之害故設其文意其

義公羊經止獲麟而左氏經終孔丘卒敢問所安答曰異乎余所聞仲尼曰文王既没文不在茲乎此制作之本意也歎曰鳳鳥不至河不出圖吾已矣夫蓋傷時王之政也麟鳳五靈王者之嘉瑞也今麟出非其時虛其應而失其歸此聖人所以為感也絕筆於獲麟之一句者所感而起固所以為終也曰然則春秋何始於魯隱公答曰周平王東周之始王也隱公讓國之賢君也考乎其時則相接言乎其位則列國本乎其始則周公之祚胤也若平王能祈天永命紹開中興隱公能弘宣祖業光啓王室則西周之美可尋文武之迹不墜是故因其歷數附其行事采周之舊以會成王義垂法將來所書之王即平王也所用之歷即周正也所稱之公即魯隱也安在其黜周而王魯乎子

曰如有用我者吾其為東周乎此其義也若夫制作之文所以章往考來情見乎辭言高則旨遠辭約則義微此理之常非隱之也聖人包周身之防既作之後方復隱諱以辟患非所聞也子路欲使門人為臣孔子以為欺天而云仲尼素王邱明素臣又非通論也先儒以為制作三年文成致麟既已妖妄又引經以至仲尼卒亦又近誣據公羊經止獲麟而左氏小邾射不在三叛之數故予以為感麟而作作起獲麟則文止於所起為得其實至於反袂拭面稱吾道窮亦無取焉

左傳後序太康元年三月吳寇始平子自江陵還襄陽解甲休兵乃申舒舊意修成春秋釋例及經傳集解始訖會及郡汲縣有發其界內舊冢者大得古書皆簡編科斗文字發冢者不以為意往往散亂科斗書久廢推尋不能盡通始者藏在祕府余晚得見之所記大凡七十五卷多雜碎怪妄不可訓知周易及紀年最為分了周易上下篇與今正同別有陰陽說而無象象文言繫辭疑於時仲尼造之於魯尚未播之於遠國也其紀年篇起自夏殷周皆三代王事無諸國別惟特記晉國起自殤叔次文侯昭侯以至曲沃莊伯莊伯之十一年十一月魯隱公之元年正月也皆用夏正建寅之月為歲首編年相次晉國滅獨記魏事下至魏哀王之二十年蓋魏國之史記也推按哀王二十年太歲在壬戌是周赧王之十六年秦昭王之八年韓襄王之十三年趙武靈王之二十七年楚懷王之三十年燕昭王之十三年齊湣王之二十五年也上去孔丘卒百

八十一歲下去今太康三年五百八十一歲哀王於史記襄王之子惠王之孫也惠王三十六年卒而襄王立立十六年卒而哀王立古書紀年篇惠王三十六年改元從一年始至十六年而稱惠成王卒即惠王也疑史記誤分惠成之世以爲後王年也哀王二十三年乃卒故特不稱謚謂之今又其著書文意大似春秋經推此足見古者國史策書之常也文稱魯隱公及邾莊公盟于姑蔑即春秋所書邾儀父未王命故不書爵曰儀父貴之也又稱晉獻公會虞師伐虢滅下陽即春秋所書虞師晉師滅下陽先書虞賄故也又稱周襄王會諸侯于河陽即春秋所書天王狩于河陽以臣召君不可以訓也諸若此輩甚多畧舉數條以明國史皆承告據實而書時事仲尼修春秋以義而制異文也又稱衛懿公及赤翟戰于洞澤疑洞當爲河即左傳所謂熒澤也齊國佐來獻玉磬紀公之甌即左傳所謂賓婚人也諸所記多與左傳符同異於公羊穀梁知此二書近世穿鑿非春秋本意審矣雖不皆與史記尚書同然參而求之可以端正學者又別有一卷純集疏左氏傳卜筮事上下次第及其文義皆與左傳同名曰師春師春似是抄集者人名也紀年又稱殷仲壬即位居亳其卿士伊尹仲壬崩伊尹放太甲于桐乃自立也伊尹即位放太甲七年太甲潛出自桐殺伊尹乃立其子伊陟伊奮命復其父之田宅而中分之左氏傳伊尹放太甲而相之卒無怨色然則太甲雖見放還殺伊尹而猶以其子爲相也此爲大與尚書叙說太甲事乖異不知老叟之伏生或致昏

忘將此古書亦當時雜記未足以取審也為其麤有益於左氏故略記之附集解之末焉

陸德明曰舊夫子之經與邱明之傳各異杜氏合而釋之故曰經傳集解

權德輿曰仲尼明周公之志而修經邱明受仲尼之經而為傳元凱悅邱明之傳而為注左氏有無經之傳杜氏又錯傳分經慮失其根本矣

晁公武曰晉杜預元凱集劉子駿賈景伯父子許惠卿顧子嚴之注分經之年與傳之年相附故題曰經傳集解其發明甚多古今稱之然其弊則棄經信傳如成公十三年麻隧之戰傳載秦敗績而經不書以為晉直秦曲則韓役書戰時公在師復不須告克獲有功亦無所諱於左傳之

例皆不合不曰傳之謬而猥稱經文闕漏其尤甚者至如此

鄭樵曰杜預解左氏顏師古解漢書所以得忠臣之名者以其盡之矣左氏未經杜氏之前凡幾家一經杜氏之後後人不能措一辭漢書未經顏氏之前凡幾家一經顏氏之後後人不能易其說縱有措辭易說之者如朝月曉星不能有其明也如此之人方可以解經苟為文言多而經旨不見文言簡而經旨有遺自我說之後後人復有說者皆非箋釋之手也傳注之學起惟此二人其殆庶幾乎其故何哉古人之言所以難明者非為書之理意難明也實為書之事物難明也非為古人之文言難明也實為古人之文言有不通於今者之難明也能明乎爾雅之所作則

可以知箋注之所當然不明乎爾雅之所作則不識箋注之旨歸也善乎二子之通爾雅也顏氏所通者訓詁杜氏所通者星歷地理當其顏氏之理訓詁也如與古人對談當其杜氏之理星歷地理也如羲和之步天如禹之行水然亦有所短杜氏則不識蟲魚鳥獸草木之名顏氏則不識天文地理孔子曰知之為知之不知為不知是知也杜氏於星歷地理之言無不極其致至於蟲魚鳥獸草木之名則引爾雅以釋之顏氏於訓詁之言甚愒至於天文地理則濶畧焉此為不知為不知也其他紛紛是何為者釋是何經明是何學

朱子曰杜預左傳解不看經文亦自成一書鄭箋不識經大旨故多隨句解

葉適曰杜氏於左傳用力深久能使後世淺俗野誕之說十去七八始學者由此而進所造益深則於春秋大義差不遠矣

陳振孫曰其述作之意序文詳之矣專修邱明之傳以釋經後世以為左氏忠臣者也其弊或棄經而信傳於傳則忠矣如經何

黃澤曰杜元凱說春秋雖曲從方氏多有背違經旨處然穿鑿處却少又曰元凱專修邱明之傳以釋經此於春秋最為有功但左氏有錯誤處必須力加辨明庶不悖違經旨此所謂愛而知其惡而杜氏乃一切曲從此其蔽也又曰推變例以正褒貶信二傳而去異端此杜元凱所得可以為法

春秋世譜 通志作小公子譜

宋志七卷 通志六卷

佚

春秋釋例

隋志十五卷

未見

摯虞曰左邱明本為春秋作傳而左傳遂自孤行釋例本為傳設而所發明何但左傳故亦孤行

崇文總目凡五十三例

黃澤曰杜元凱作春秋經傳集解之外自有釋例一部凡地名之類靡不皆有此自前代經師遞相傳授所以可信晁公武曰晉杜預撰凡四十部集左傳諸例及地名譜第

歷數皆顯其同異從而釋之發明尤多昔人稱預為左氏忠臣而預自以為有傳癖觀此尤信

陳振孫曰唐劉蕡為之序

吳萊後序曰春秋左氏漢初本無傳者劉子駿始建明之欲立學官諸儒莫應然傳之者亦已衆多賈景伯服子慎並為訓解及晉而杜元凱又作經傳集解三十卷釋例四十卷且歷詆劉賈之違獨不言服氏豈或不見服氏書乎亦不應不見也世族譜本之劉向世本地志本之秦始郡國圖長歷本之劉洪乾象歷世多言其天文星歷為長然說經多依違以就傳似不得為左氏忠臣者南北分裂館陶趙世業家有服氏春秋是晉永嘉舊寫華陰徐生往讀之遂撰春秋義章以教學者是永嘉時猶未尚杜氏青州

刺史杜坦及其弟驥世傳其業故齊地亦多習之坦元凱
之子孫也姚文安秦道靜初亦學服氏後更兼講杜說劉
蘭張吾貴之徒則又隱括兩家同異義例無窮嗚呼漢初
習經者專門而今河洛習傳者宗服子慎江左尚杜元凱
矣晉劉兆始取公穀及左氏說作春秋調人而今蘭吾貴
又會服杜之說矣聖人之道不自是而愈散哉自唐孔穎
達春秋正義一用杜氏非徒劉賈之說不存服義亦不盡
見固不若兩存之以見服杜之為孰愈也今釋例具在有
劉蕢序蕢太和中對賢良策譏切人主斥罵宦者文極激
學一本春秋與漢董生天人三策相為上下蕢亦自擬董
生且曰昔董仲舒為漢武帝言之未盡者今臣復為陛下
言之壯哉蕢乎至為此序獨不類唐文之衰至此極矣

春秋左傳音

七錄三卷

佚

隋書梁有服虔杜預音三卷

春秋左氏傳評

隋志二卷

佚

春秋經傳長歷

佚 惟論存

預自序曰書稱暮三百六旬有六日以閏月定四時成歲
允釐百工庶績咸熙是以天子必置日官諸侯必置日御
世修其業以考其術舉全數而言故曰六日其實五日四

分之一日日行一度而月日行十三度十九分度之有畸
日官當會集此之遲疾以考成晦朔錯綜以設閏月閏月
無中氣而北斗邪指兩辰之閒所以異於他月也積此以
相通四時八節無違乃得成歲其微密至矣得其精微合
天道事叙而不悖故傳曰閏以正時時以作事事以厚生
生民之道於是乎在然陰陽之運隨動而差差而不已遂
與歷錯故仲尼邱明每於朔閏發文蓋矯正得失因以宣
明歷數也桓十七年日食得朔而史闕其日單書朔僖十
五年日食而史闕朔與日故傳因其得失並起時史之謬
兼以明其餘日食或歷失其正也莊二十五年經書六月
辛未朔日有食之鼓用牲于社周之六月夏之四月所謂
正陽之月也而時歷誤實是七月之朔非六月故傳云非

常也惟正月之朔慝未作日有食之於是乎有用幣于社
伐鼓於朝此非用幣伐鼓常月因變而起歷誤也文十五
年經文皆同而更復發傳曰非禮明前傳欲以審正陽之
月後傳發例欲以明諸侯之禮也此乃聖賢之微告先儒
所未喻也昭十七年夏六月日有食之而平子言非正陽
之月以誣一朝近於指鹿為馬故傳曰不君君且因以明
此月為得天正也劉子駿造三統歷以修春秋春秋日食
有甲乙者三十四而三統歷惟一食歷術比諸家既最疎
又六千餘歲輒益一日凡歲當累日為次而無故益之此
不可行之甚者班固先代名儒而謂之最密非徒班固也
自古以來諸論春秋者多述謬誤或造家術或用黃帝以
來諸歷以推經傳朔日皆不得諧合日食于朔此乃天驗

經傳又書其朔食可謂得天而劉賈諸儒說皆以為月二日或三日公違聖人明文其蔽在於守一元不與天消息也余感春秋之事嘗著歷論極言歷之通理其大指曰天行不息日月星辰各運其舍皆動物也物動則不一雖行度大量可得而限累日為月以新故相序不得不有毫毛之差此自然理也故春秋日有頻月而食者曠年不食者理不得一而算守恒數故歷無不有差失也始失于毫毛而尚未可覺積而成多以失弦望朔晦則不得不改憲以從之書所謂欽若昊天歷象日月星辰易所謂治歷明時言當順天以求合非為合以驗天者也推此論之春秋二百餘年其治歷變通多矣雖數術絕滅還尋經傳微音大量可知時之違謬則經傳有驗學者固當曲循經傳月日日食以考晦朔也以推時驗而皆不然各據其學以推春秋此無異度已之跡而欲削他人之足也余為歷論之後至咸寧中善算李修夏顯依論體為術名乾度歷表上朝廷其術合日行四分之數而微增月行用三百歲改憲之意二元相推七十餘歲承以強弱強弱之差蓋少而適足以遠通盈縮時尚書及史官以乾度與太始歷參校古今記注乾度歷殊勝今其術具存時又并考古今十歷以驗春秋知三統歷之最疎也今具列其時得失之數又據經傳微旨證據及失閏旨考日辰朔晦以相發明為經傳長歷諸經傳證據及失閏時文字謬誤皆甄發之雖未必其得天蓋春秋當時之歷也學者覽焉

經義考卷一百七十三終

弟子太倉王原博覆按

經義考卷一百七十四

秀水 朱彝尊 編

男 昆田 按

春秋 七

劉氏寔 春秋條例

隋志十一卷

佚

左氏牒例

唐志二十卷

佚

晉書劉寔字子真平原高唐人泰始初少府咸寧中轉尚書元康九年策拜司空懷帝即位授太尉自少及老篤學

不倦尤精三傳正公羊以為衛輒不應辭以王父命祭仲失為臣之節舉此二端以明臣子之體遂行於世又撰春

秋條例二十卷

春秋公羊達義唐志達作達

七錄三卷

佚

集解春秋序

隋志一卷

佚

汜氏統春秋釋疑

佚

晉書汜毓字稚春濟北盧人武帝召補南陽王文學秘書

郎太傅參軍並不就於時青土隱逸之士劉兆徐苗等皆

務教授惟毓不蓄門人清淨自守時有好古慕德者諮詢

亦傾懷開誘以一隅示之合三傳為之解注撰春秋釋疑

肉刑論凡所述造七萬餘言

劉氏兆春秋公羊穀梁傳解詁

隋志十二卷

佚

春秋三家集解

唐志十一卷

佚

春秋左氏全綜

佚

春秋調人

佚

晉書劉兆字延世濟南東平人博學洽聞溫篤善誘從受業者數千人武帝時五辟公府三徵博士皆不就潛心著述不出門庭數十年以春秋一經而三家殊塗諸儒是非之議紛然互為讐敵乃思三家之異合而通之周禮有調人之官作春秋調人七萬餘言皆論其首尾使大義無乖時有不合者舉其長短以通之又為春秋左氏解名曰全綜公羊穀梁解詁皆納經傳中朱書以別之

王氏接公羊春秋注

佚

晉書王接字祖遊河東猗氏人永寧初舉秀才除中郎接學雖博通特精禮傳嘗謂左氏辭義贍富自是一家書不立為經發公羊附經立傳經所不書傳不妄起於文為儉通經為長任城何休訓釋甚詳而黜周王魯大體乖礙且志通公羊而往往還為公羊疾病接乃更注公羊春秋多有新義

王氏愆期注春秋公羊經傳

隋志十三卷 唐志十二卷

佚

晉書接長子愆期流寓江南緣父本意更注公羊

陸德明曰愆期字門子河東人東晉散騎常侍辰陽伯

公羊難答論

七錄二卷 唐志一卷

隋書晉車騎將軍庾翼問王愆期答

王氏長文春秋三傳

佚

華陽國志王長文字德儁廣漢鄭人察孝廉不就後拜蜀郡太守以為春秋三傳傳經不同每生訟議乃據經摭傳著春秋三傳十二篇

張氏靖穀梁傳注

隋志十卷

佚

隋書晉堂邑太守

江氏熙公羊穀梁二傳評

唐志三卷

佚

徐氏乾春秋穀梁傳注

七錄十三卷

佚

陸德明曰乾字文祚東莞人東晉給事中

孔氏衍春秋穀梁傳唐志作訓注

隋志十四卷唐志十三卷

佚

春秋公羊傳集解

七錄十四卷

佚

晉書孔衍字舒元魯國人孔子二十二世孫中興初禱中

書郎領太子中庶子出為廣陵相

程氏

闡春秋經傳集注

隋志作春秋穀梁傳

唐志十六卷

佚

胡氏

訥春秋穀梁傳集解

七錄十卷

佚

春秋三傳評

隋志十卷

佚

春秋集三師難

七錄三卷

佚

春秋集三傳經解

七錄十卷

唐志十一卷

佚

劉氏

瑤

穀梁傳注

佚

范氏

甯

春秋穀梁傳集解

隋志十二卷

存

晉書甯字武子解褐為餘杭令遷臨淮太守徵拜中書侍郎補豫章太守甯以春秋穀梁氏未有善釋遂沈思積年為之集解其義精審為世所重既而徐邈復為之注世亦

稱之

甯自序曰昔周道衰陵乾綱絕紐禮壞樂崩彝倫攸斃弒逆篡盜者國有淫縱破義者比肩是以妖災因釁而作民俗染化而遷陰陽爲之愆度七曜爲之盈縮川岳爲之崩竭鬼神爲之疵厲故父子之恩缺則小弁之刺作君臣之禮廢則桑扈之諷興夫婦之道絕則谷風之篇奏骨肉之親離則角弓之怨彰君子之路塞則白駒之詩賦天垂象見吉凶聖作訓紀成敗欲人君戒愼厥行增修厥德蓋誨爾諄諄聽我藐藐履霜堅冰所由者漸四夷交侵華戎同貫幽王以暴虐見禍平王以微弱東遷征伐不由天子之命號令出自權臣之門故兩觀表而臣禮亡朱干設而君權喪下陵上替階過理極天下板蕩王道盡矣孔子觀滄海之橫流廼喟然而歎曰文王旣沒文不在茲乎言文王之道喪興之者在已於是就太師而正雅頌因魯史而修春秋列黍離於國風齊王德於邶君所以明其不能復雅政化不足以被群后也於時則接乎隱公故因茲以託始該二儀之化育贊人道之幽變舉得失以彰黜陟明成敗以著勸誡拯頹綱以繼三五鼓芳風以扇遊塵一字之褒寵踰華袞之贈片言之貶辱過市朝之撻德之所助雖賤必伸義之所抑雖貴必屈故附勢匿非者無所逃其罪潛德獨運者無所隱其名信不易之宏規百王之通典也先王之道旣弘麟感化而來應因事備而終篇故絕筆於斯年成天下之事業定天下之邪正莫善於春秋春秋之傳有三而爲經之旨一臧否不同褒貶殊致蓋九流分而微

言隱異端作而大義乖左氏以鬻拳兵諫爲愛君文公納幣爲用禮穀梁以衛輒拒父爲尊祖不納子糾爲內惡公羊以蔡仲廢君爲行權妾母稱夫人爲合正以兵諫爲愛君是人主可得而脅也以納幣爲用禮是居喪可得而婚也以拒父爲尊祖是爲子可得而叛也以不納子糾爲內惡是仇讐可得而容也以廢君爲行權是神器可得而闕也以妾母爲夫人是嫡庶可得而齊也若此之類傷教害義不可得強通者也凡傳以通經爲主經以必當爲理夫至當無二而三傳殊說庸得不棄其所滯擇善而從乎既不俱當則因容俱失若至言幽絕擇善靡從庸得不並舍以求宗據理以通經乎雖我之所是理未全當安可以得當之難而自絕於希通哉而漢興以來瓌望碩儒各信所習是非紛錯準裁靡定故有父子異同之論石渠分爭之說廢興由於好惡盛衰繼之辨訥斯蓋非通方之至理誠君子之所歎息也左氏艷而富其失也誣穀梁清而婉其失也短公羊辨而裁其失也俗若能富而不誣清而不短裁而不俗則深於其道者也故君子之於春秋沒身而已矣升平之末歲次大梁先君北藩回軫頓駕於吳乃帥門生故吏我兄弟子姪研講六籍次及三傳左氏則有服杜之注公羊則有何嚴之訓釋穀梁傳者雖近十家皆膚淺末學不經師匠辭理典據旣無可觀又引左氏公羊以解此傳文義違反斯害也已於是乃商略名例敷陳疑滯博示諸儒同異之說昊天不弔泰山其頽匍匐墓次死亡無日日月逾邁跂及視息乃與二三學士及諸子弟各記所

經義考 卷一百七十四
識并言其意業未及終嚴霜夏墜從弟凋落二子泯沒天
實喪予何痛如之今撰諸子之言各記其姓名名曰春秋
穀梁集解

王通曰范甯有志於春秋徵聖經而詰衆傳

楊士勛曰魏晉以來注公穀者有尹更始唐固麋信孔衍
江熙程闔徐仙民徐乾劉瑤胡訥之等甯以傳者雖多妄
引三傳辭理典據不足可觀故與門徒商略名例博示同
異而不必限於其說也
晁說之曰穀梁晚出於漢因得監省左氏公羊之違畔而
正之其精深遠大者真得子夏之所傳與范甯又因諸儒
而博辨之申穀梁之志也其於是非亦少公矣非若杜征
南一切申傳汲汲然不敢異同也

王哲曰自漢崇學校三傳迭興以賈誼之才仲舒之文向
歆之學猶溺於師說不能會通況其餘哉其專窮師學以
自成一家者則何氏杜氏范氏而已何氏則壽張瞽說杜
氏則膠固傳文其稍自覺悟者惟范氏爾

晁公武曰自漢魏以來穀梁注解有尹更始唐固麋信孔
衍江熙等十數家而范甯皆以爲膚淺於是帥其長子泰
中子雍小子凱從弟邵及門生故吏商略名例博採諸儒
同異之說成其父汪之志嘗謂三傳之學穀梁所得最多
諸家之解范甯之論最善

陳振孫曰晉豫章太守順陽范甯武子撰甯嘗謂王何之
罪深於桀紂著論以排之以春秋惟穀梁氏無善釋故爲
之注解其序云升平之末先君稅駕於吳帥門生故吏兄

弟子姪研講六籍三傳蓋甯父汪爲徐兗二州北伐失利
屏居吳郡時也汪沒之後始成此書所集諸家之說皆記
姓名其稱何休曰及鄭君釋之者即所謂發墨守起廢疾
也稱邵曰者甯從弟也稱泰曰雍曰凱曰者其諸子也汪
范晷之孫晷在良吏傳自晷至泰五世皆顯於時甯父子
祖孫同訓釋經傳行於後世可謂盛矣泰之子晷亦著後
漢書以不軌誅死其家始亡

黃震曰杜預注左氏獨主左氏何休注公羊獨主公羊惟
范甯不私於穀梁而公言三家之失

王應麟曰穀梁先有尹更始唐固麋信孔衍江熙段肅張
靖等十餘家范甯以爲膚淺乃商略名例爲集解十二卷
例一卷蓋杜預屈經以申傳何休引緯以汨經惟甯之學

最善

家鉉翁曰何休治公羊傳外多生支節失公羊之本旨若
范甯治穀梁能知穀梁之非視休爲長

春秋穀梁傳例

隋志一卷

佚

京相氏璠春秋土地名

隋志三卷

佚

隋書晉裴秀客

酈道元曰京相璠與裴司空彥季修晉輿地圖作春秋地
名

鄭樵曰京相璠春秋土地名見於杜預地名譜桑欽水經

注

孫氏毓春秋左氏傳義注

隋志十八卷 唐志三十卷釋文序錄二十八卷

佚

春秋左氏傳賈服異同略

隋志五卷

佚

徐氏邈春秋左氏傳音

隋志三卷 唐志一卷

佚

春秋穀梁傳注

隋志十二卷

佚

答春秋穀梁義

隋志三卷

佚

春秋穀梁傳義

隋志十卷

佚

晉書徐邈注穀梁傳見重於時

荀氏訥春秋左氏傳音

七錄四卷

佚

春秋

陸德明曰訥字世言新蔡人東晉尚書左民郎

李氏 軌 春秋左氏傳音

隋志三卷

佚

春秋公羊傳音

七錄一卷

佚

方氏 範 春秋經例

隋志十二卷

唐志六卷

佚

殷氏 興 春秋釋帶

七錄十卷

佚

隋書晉尚書左丞殷興撰

虞氏 溥 注春秋經傳

佚

晉書虞溥字允源高平昌邑人郡察孝廉除郎中稍遷公車司馬令除鄱陽內史注春秋經傳

郭氏 瑀 春秋墨說

佚

晉書郭瑀字元瑜敦煌人精通經義隱於臨松薤谷鑿石窟而居作春秋墨說孝經錯緯弟子著錄千餘人

干氏 寶 春秋左氏函傳義

舊唐書作春秋義函傳
新唐書作春秋函傳

隋志十五卷

唐志十六卷

春秋序論 佚

隋志二卷 唐志一卷

佚

一 晉書寶為春秋左氏義外傳

范氏堅 春秋釋難

七錄三卷

佚

高氏蕞 春秋公羊傳注 新舊唐志龍作蕞傳注作傳記

七錄十二卷

佚

陸德明曰字文 范陽人東晉河南太守

江氏傳 春秋公羊傳音

七錄一卷

佚

聶氏熊 注穀梁春秋

佚

晉書國子祭酒聶熊注穀梁春秋列於學官

黃氏容 左傳抄

佚

華陽國志蜀郡太守巴西黃容好述作著左傳抄數十年

薄氏叔 問穀梁義

隋志二卷 七錄四卷

佚

經義考卷一百七十四終

弟子秀水諸嗣熒覆技

經義考卷一百七十五

秀水 朱彝尊 編

男 昆田 校

春秋八

謝氏莊春秋圖

佚

南史謝莊分左氏經傳隨國立篇製木方丈圖山川土地各有分理離之則州郡殊別合之則寓內為一

何氏始真春秋左氏區別

隋志三十卷

佚

隋書宋尚書功論郎

齊晉安王蕭子懋春秋例苑

三十卷

佚

南齊書晉安王子懋字雲昌世祖第七子撰春秋例苑三十卷奏之世祖嘉之勅付祕閣

王氏儉春秋音

唐志二卷

佚

杜氏乾光春秋釋例引序

七錄一卷

佚

隋書齊正員郎

王氏延之春秋旨義

隋志十卷

佚

春秋左氏經傳通解

隋志四卷

佚

南史延之字希季仕宋為司徒左長史歷吏部尚書左僕射齊建元元年進號鎮南將軍後為尚書左僕射領竟陵

王師

吳氏略春秋經傳說例疑隱

七錄一卷

佚

梁簡文帝左氏傳例苑

唐志十八卷隋志不著簡文帝作十九卷

佚

春秋發題

七錄一卷

佚

春秋左氏圖

通志十卷

佚

劉氏之遴 春秋大意 左氏 三傳同異

佚

梁書劉之遴字思貞南陽涅陽人起家寧朔主簿遷中

書侍郎兼中書舍人出為南郡太守久之為太府卿都官

尚書太常卿之遴好屬文多學古體與河東裴子野沛國

劉顯常共討論書籍是時周易尚書禮記毛詩並有高祖

義疏惟左氏傳尚闕之遴乃著春秋大意十科左氏十科

三傳同異十科合三十事以上之高祖大悅詔答之曰省

所撰春秋義比事論書辭微旨遠編年之教言闡義繁邱

明傳洙泗之風公羊稟西河之學鐸椒之解不追瑕邱之

說無取繼踵胡毋仲舒云盛因修公穀千秋最篤張蒼之

傳左氏賈誼之襲荀卿源本分鑣指歸殊致詳略紛然其

來舊矣昔在弱年乃經研味一從遺置迄將五紀兼晚冬

晷促機事罕暇夜分求衣未遑搜括須待夏景試取推尋

若温故可求別酬所問也

沈氏宏 春秋五辨

隋志二卷

隋書梁五經博士

春秋經傳解

唐志六卷

佚

春秋文苑

隋志六卷

佚

春秋嘉語

隋志六卷

未見

崔氏靈恩 春秋經傳解

隋志六卷

佚

春秋申先儒傳論 唐志論作例

隋志十卷

佚

春秋左氏傳立義

隋志十卷

佚

春秋序

隋志一卷

佚

南史靈恩先習左傳服解不為江東所行乃改說杜義每文句常申服以難杜遂著左氏條議以明之時助教虞僧誕又精杜學因作申杜難服以答靈恩世並傳焉靈恩左氏經傳義二十二卷左氏條例十卷公羊穀梁文句義十卷

田氏元休春秋序

隋志一卷

佚

賀氏道養春秋序

隋志一卷

佚

沈氏文阿春秋左氏經傳義略釋文作義疏

隋志二十五卷唐志二十七卷

佚

南史文阿字國衛吳興武康人通三禮三傳位五經博士尋遷

通直散騎常侍兼國子博士所撰儀禮八十餘條春秋禮

記孝經論語義七十餘卷經典大義十八卷並行於時也

陸德明曰文阿撰春秋義疏闕下帙王元規續成之

張氏沖春秋義略

隋志三十卷

佚

隋書陳右軍將軍

北史張沖字叔弇吳郡人仕陳為左中郎將非其好也乃

覃思經典撰春秋義略異於杜氏七十餘事

賈氏思同春秋傳駁

十卷

佚

北史賈思伯字仕休齊郡益都人弟思同字仕明為侍講授靜帝杜氏春秋加散騎常侍兼七兵尚書尋拜侍中卒諡文獻思同之侍講也國子博士遼西衛冀隆精服氏學上書難杜氏春秋六十三事思同復駁冀隆乖錯者一十餘條互見是非積成十卷詔下國學集諸儒考之事未竟而思同卒後魏郡姚文安樂陵秦道靜復述思同意冀隆亦尋物故浮陽劉休和又持冀隆說竟未能裁正

潘氏叔虔春秋經合三傳唐志作三傳通論

隋志十卷

佚

春秋成套唐志作集

隋志十卷

佚

北史河北諸儒能通春秋者張買奴馬敬德邢峙張思伯張奉禮張彫劉晝鮑長宣王元則並得服氏之精微又有衛凱陳達潘叔虔亦為通解又有姚文安秦道靜初亦學服氏後兼更講杜元凱所注

王氏元規續春秋左氏傳義略

隋志十卷

佚

春秋發題辭 義記

十一卷

佚

左傳音

唐志三卷

佚

南史王元規字正範太原晉陽人少從吳興沈文阿受業通春秋左氏孝經論語喪服仕梁位宣城王記室參軍陳後主在東宮引為學士俄除尚書祠部郎自梁代諸儒相傳為左氏學者皆以賈逵服虔之義難駁杜預凡一百八十條元規引證通析無復疑滯著春秋發題辭及義記十一卷左傳音三卷

辛氏子馥 春秋三傳總

佚

冊府元龜辛子馥為尚書右丞以三傳經同說異遂總為一部傳注並出校比短長會亡未就

劉氏獻之 春秋三傳略例

三卷

佚

北史獻之每講左氏盡隱公八年便止云義例已了不復講解由是弟子不能究竟其說魏承喪亂之後五經大義雖有師說諸生多有疑滯咸決於獻之六藝之文雖不悉注所撰宗旨頗異舊義撰三傳略例三卷

徐氏遵明 春秋義章

春秋

三十卷

佚

北史徐遵明字子判華陰人知陽平館陶趙世業家有服氏春秋是晉世永嘉舊寫遵明乃往讀之經數載因手撰春秋義章為三十卷

姚氏文安左氏駁妄

佚

北史姚文安難服虔左傳解七十七條名曰駁妄

李氏崇祖左氏釋謬

佚

北史崇祖字子述申明服氏名曰釋謬

李氏鉉春秋二傳異同

唐志十二卷

佚

張氏思伯左氏刊劄

十卷

佚

北史張思伯河間樂城人善說左氏傳為馬敬德之次撰刊例十卷位國子博士

樂氏遜春秋序論

佚

春秋序義

佚

北史樂遜字尊賢河東猗氏人開府儀同大將軍東揚州

刺史著孝經論語毛詩左氏春秋序論十餘篇又著春秋序義通賈服說發杜氏違辭理並可觀

辛氏德源春秋三傳集注

三十卷

佚

北史德源字孝基隴西狄道人仕周為宣納上士

劉氏炫春秋左傳杜預序集解

隋志一卷

佚

春秋左氏傳述義

隋志四十卷唐志三十七卷宋志述義略一卷

佚

春秋攻昧

唐志十二卷本傳十卷

佚

春秋規過

唐志三卷

佚

春秋義囊

宋志二卷

佚

顧氏啟期大夫譜

唐志十一卷隋志有春秋左氏諸大夫世譜十三卷疑即是書

佚

崇文總目不著撰人名氏凡七卷起黃帝至周見於春秋諸國世系傳久稍失其次矣按隋唐書目春秋大夫世族譜十三卷顧啟期撰而杜預釋例自有世族譜一卷今書與釋例所載不同而本或題云杜預撰者非也疑此乃啟期所撰云

晁公武曰譜左氏諸國君臣世系獨秦無世臣

鄭樵曰有杜預春秋公子譜無顧啟期大夫譜可也

李氏謚春秋叢林

唐志十二卷隋志不著姓氏

佚

冊府元龜李謚涿郡人鳩集諸經廣校同異比三傳事例名春秋叢林十二卷徵拜著作佐郎辭以授弟郇

沈氏仲義春秋穀梁傳集解

唐志十卷

未見

蕭氏邕穀梁傳義

唐志三卷

佚

孔氏春秋公羊傳集解

唐志十四卷

佚

孔氏春秋穀梁傳指訓

七錄十四卷隋志五卷

佚

張程孫劉穀梁傳四家集解

隋志四卷

佚

按四家集解當是張靖程闡孫毓劉瑤

亡名氏春秋左氏傳條例

隋志二十五卷

佚

春秋義例

隋志十卷

佚

春秋義林

隋志一卷

佚

春秋大夫辭

隋志三卷

佚

春秋辨證

唐志作辨證明經論

隋志六卷

佚

春秋左氏義略

隋志八卷

佚

春秋五十凡義疏

隋志二卷

佚

春秋公羊穀梁二傳評

隋志三卷

佚

左氏評

唐志一卷

佚

左氏音

唐志十二卷

佚

左氏鈔

唐志十卷

佚

春秋辭苑

唐志五卷

佚

春秋雜義難

唐志五卷

佚

春秋井田記

佚

史繩祖曰後漢循吏傳白首不入市井注引春秋井田記云井田之義有五一曰無泄天時地氣二曰無費一家三曰同風俗四曰合巧拙五曰通財貨因井為市交易而退

經義考卷一百七十五
故稱市井也按春秋井田記不見於他書獨此引用故表
而出之

經義考卷一百七十五終

弟子秀水徐天植覆按

經義考卷一百七十六

秀水 朱彝尊 編

男 昆田 校

春秋 九

唐章懷太子賢春秋要錄

唐志十卷

佚

陸氏德明春秋釋文

八卷

存

按陸氏釋文左傳六卷公羊穀梁各一卷

孔氏穎達等春秋正義

唐志三十六卷

存

穎達序曰夫春秋者紀人君動作之務是左史所職之書王者統三才而宅九有順四時而治萬物四時序則玉燭調於上三才協則寶命昌於下故可以享國永年令聞長世然則有為之務可不慎與國之大事在祀與戎祀則必盡其敬戎則不加無罪盟會協於禮興動順其節失則貶其惡得則褒其善此春秋之大旨為皇王之明鑒也若夫三始之目章於帝軒六經之道光於禮記然則此書之發其來尚矣但年紀繇邈無得而言暨乎周室東遷王綱不振楚子北伐神器將移鄭伯敗王於前晉侯講隧於後竊僭名號者何國不然專行征伐者諸侯皆是下陵上替內

叛外侵九域騷然三綱遂絕夫子內韞大聖逢時若此欲垂之以法則無位正之以武則無兵賞之以利則無財說之以道則不用虛歎銜書之鳳乃似喪家之狗既不救於已往冀垂訓於後昆因魯史之有得失據周經以正褒貶一字所嘉有同華袞之贈一言所黜無異蕭斧之誅所謂不怒而人威不賞而人勸實永世而作則歷百王而不朽者也至於秦滅典籍鴻猷遂寢漢德既興儒風不泯其前漢傳左氏者有張蒼賈誼尹咸劉歆後漢有鄭眾賈逵服虔許惠卿之等各為詁訓然雜取公羊穀梁以釋左氏此乃以冠雙屨將絲綜麻方鑿圓枘其可入乎晉世杜元凱又為左氏集解專取邱明之傳以釋孔氏之經所謂子應乎母以膠投漆雖欲勿合其可離乎今按先儒優劣杜為

甲矣故晉宋傳授以至於今其為義疏者則有沈文阿蘇
寬劉炫然沈氏於義例麤可於經傳極疎蘇氏則全不體
本文惟苟攻賈服言後之學者鑽仰無成劉炫於數君之
內實為翹楚然聰慧辨博固亦罕儔而探賾鉤深未能致
遠其經注易者必具飾以文辭其理致難者乃不入其根
節又意在矜伐性好非毀規杜氏之失凡一百五十餘條
習杜義而攻杜氏猶蠹生於木而還食其木非其理也雖
規杜過義又淺近所謂捕鳴蟬於前不知黃雀在其後按
僖公三十三年經云晉人敗狄于箕杜注云卻缺稱人者
未為卿劉炫規云晉侯稱人與穀戰同按穀戰在葬晉文
公之前可得云背喪用兵以賤者告箕戰在葬晉文公之
後非是背喪用兵何得云與穀戰同此則一年之經數行

而已曾不勘省上下妄規得失又襄公二十一年傳云邾
庶其以漆閭邱來奔以公姑姊妻之杜注云蓋寡者二人
劉炫規云是襄公之姑成公之姊只一人而已按成公二
年成公之子公衡為質及宋逃歸按家語本命云男子十
六而化生公衡已能逃歸則十六七矣公衡之年如此則
於時成公三十三四矣計至襄二十一年成公七十餘矣
何得有姊而妻庶其此等皆其事歷然猶尚妄說況其餘
錯亂良可悲矣然比諸義疏猶有可觀今奉勅刪定據以
為本其有疎漏以沈氏補焉若兩義俱違則特申短見雖
課率庸鄙仍不敢自專謹與朝請大夫國子博士臣谷那
律故四門博士臣楊士勛四門博士臣朱長才等對共參
定至十六年又奉勅與前修疏人及朝散大夫行大學博

一士上騎都尉臣馬嘉運朝散大夫行大學博士上騎都尉
臣王德韶給事郎守四門博士上騎都尉臣蘇德融登仕
郎守大學助教雲騎尉臣隨德素等對勅使趙弘智覆更
詳審為之正義凡三十六卷冀貽諸學者以裨萬一焉
崇文總目按漢張蒼賈誼尹咸鄭眾賈逵皆為詁訓然參
用公穀二家至晉杜預專治左氏其後有沈文阿蘇寬劉
炫皆據杜說貞觀中穎達據劉學而損益之長孫無忌等
又復損益其書乃定皇朝孔准等奉詔是正
中興書目穎達參劉沈之說兩義俱違則斷以己意
晁公武曰自杜預專治左氏學其後沈文阿蘇寬劉炫皆
竊義疏而炫性矜伐雅好非毀規杜氏之失一百五十餘
事義特淺近然比諸家猶有可觀今書據以為本其有疎
漏以沈氏補焉

陳振孫曰自晉宋傳杜學為義疏者沈蘇劉沈氏義例
可經傳極疎蘇氏不體本文惟攻賈服劉氏好規杜失比
諸義疏猶有可觀

楊氏士勛春秋穀梁傳疏

唐志十二卷

存

崇文總目唐國子四門助教楊士勛撰皇朝邢昺等奉詔
是正太學傳授

春秋公穀考異

宋志五卷

佚

徐氏 文遠 左傳義疏

唐志六十卷

佚

左傳音

唐志三卷

佚

舊唐書徐文遠洛州偃師人博覽五經尤精春秋左氏傳大業初為太學博士時人稱文遠之左氏褚徽之禮魯達之詩陸德明之易皆為一時之最文遠所講釋多立新義先儒異論皆定其是非然後詰駁諸家又出己意博而且辨聽者忘倦武德六年高祖幸國學觀釋奠遣文遠時為國子博士發春秋題諸儒設難蠶起隨方占對皆莫能屈

黃淵曰徐文遠發題徧舉先儒異論分別是非乃出己意折衷不知合乎夫子否也

陰氏 弘道 注春秋左氏傳序

唐志一卷

佚

王氏 彜度 注春秋左氏傳

唐志卷七

佚

王氏 元感 春秋振滯

唐志二十卷

佚

啖氏 助 春秋集傳

經義考 春秋

卷一百七十六

五

佚

春秋例統

佚

助自述曰三傳分流其源則同擇善而從且過半矣予考
覈三傳舍短取長又集前賢注釋亦以愚意裨補闕漏商
榷得失研精宣暢期於浹洽尼父之志庶幾可見疑殆則
闕以俟君子謂之春秋集傳集注又撮其綱目撰為統例
三卷以輔集傳通經意焉 又曰予所著經傳若舊注理
通則依而書之小有不安則隨文改易若理不盡者則演
而通之理不通者則全削而別注其未詳者則據舊說而
已但不博見諸家之注不能不為之恨爾

陸淳曰啖先生諱助字叔佐關中人也聰悟簡淡博通深
識天寶末客於江東因中原難興遂不還歸以文學入仕
為台州臨海尉復為潤州丹陽主簿秩滿因家焉陋巷狹
居晏如也始以上元辛丑歲集三傳釋春秋至大歷庚戌
歲而畢趙子時宦於宣歙之使府因往還浙中途過丹陽
乃詣室而訪之深話經意事多嚮合期反駕之日當更討
論嗚呼仁不必壽是歲先生卽世時年四十有七是冬也
趙子隨使府遷鎮於浙東淳痛師學之不彰乃與先生之
子異躬自繕寫共載以詣趙子趙子因損益焉淳隨而纂
會之至大歷乙卯歲而書成

新唐書啖助字叔佐趙州人後徙關中天寶末調臨海尉
丹陽主簿善為春秋考三家短長縫綻漏闕號集傳凡十
年乃成復攝其綱條為例統助愛公穀二家以左氏解義

多謬其書乃出於孔氏門人且論語孔子所引率前世人
老彭伯夷等類非同時而言左邱明恥之正亦恥之邱明
者蓋如史佚遲任又左氏傳國語屬綴不倫序事乖刺非
一人所爲蓋左氏集諸國史以釋春秋後人謂左氏便傳
著邱明非也

宋祁曰左氏與孔子同時以魯史附春秋作傳而公羊高
穀梁赤皆出子夏門人三家言經各有回舛然猶悉本之
聖人其得與失蓋十五義或謬誤先儒畏聖人不敢輒改
也啖助在唐名治春秋摭訛三家不本所承自用名學憑
私臆決尊之曰孔子意也趙陸從而唱之遂顯於時嗚呼
孔子沒乃數千年所推著果其意乎其未可必也以未
可必而必之則固持一己之固而倡茲世則誣誣與固君
子所不取助果謂可乎徒令後生穿鑿詭辨詬前人捨成
說而自謂紛紛助所階已

王哲曰啖趙二子相繼發明聖人之意指摘三傳之謬固
有功矣然探聖人之意或未精斥三傳之謬或太察可謂
入聖人之門而游乎宮庭之間者也其堂奧則未知也
邵子曰春秋三傳之外陸淳啖助可以兼治

徐積曰啖趙二氏有大功於春秋但未能全盡耳考其所
學蓋不止於春秋貫穿經義窮極是非所論不苟若斯人
者豈易得哉

陸九淵曰啖趙說得有好處故人謂啖助有功於春秋
程秘曰聖人作春秋一用周典而啖助以爲用夏爲本
張樞曰啖氏春秋卓然有見於千載之下

趙氏匡春秋闡微纂類義統

十卷

闕

匡自述曰啖先生集三傳之善以說春秋其所未盡則申己意條例明暢真通賢之爲也惜其經之大意或未標顯傳之取舍或有過差蓋纂述僅畢未及詳省爾子因尋繹之次心所不安者隨而疏之

陸淳曰趙子天水人爲殿中侍御史淮南節度判官

新唐書匡字伯循河東人歷洋州刺史陸質所稱爲趙夫子者質與啖助子異哀錄助所爲春秋集注總例請匡損益質纂會之

章拱之曰趙氏集啖氏統例集注二書及己說可以例舉者爲闡微義統十二卷第三四卷亡逸

楊慎曰杜預作春秋釋例趙匡作春秋纂例蓋以春秋難明故以例求之至於不通則又云變例變例不通又疑經有闕文誤字嗚呼聖人之作豈先有例而後作春秋乎

陸氏質集注春秋

唐志二十卷

佚

呂溫代草進表曰臣聞惟睿作聖觀乎人文達則化成窮則垂訓先師所以祖述堯舜志在春秋懸衡百王撥亂三季正大當之本清至公之源通羣芳以誠貞天下於一動無不順道德之要機斷無不齊帝王之利器而梁木旣壞生知蓋寡三傳得失索隱未周羣儒異同致遠皆泥沒微

言於滋蔓亡要旨於多岐奧室不開漫逾千祀天其或者
將有俟焉陛下德合乾坤明竝日月氣和物茂遠至邇安
欲以人情爲田講學而耨鎮定皇極輝光時雍道之將行
實在今日臣不揣蒙陋斐然有志思窺聖奧仰奉文明以
故潤州丹陽縣主簿臣啖助爲嚴師以故洋州刺史臣趙
匡爲益友考左氏之疎密辨公穀之善否務去異端用明
本意助或未盡敢讓當仁匡有可行亦刈其楚輒集注春
秋經文勒成十卷上下千載研覃三紀兮首雖白濁河已
清微臣何幸與道相遇竊以德之匪鄰骨肉無應道苟訢
合古今相知然則堯舜之心非宣尼不見宣尼之志非陛
下不行庶因儀鳳之辰永洗獲麟之恨臣官忝國學思非
出位道爲家寶罪實欺天謹昧死寫前件書詣東上閤門

奉進

舊唐書陸質吳郡人本名淳避憲宗名改之質有經學尤
深於春秋少師事趙匡匡師啖助頗傳其學爲給事中
柳宗元作墓表曰孔子作春秋千五百年以名爲傳者五
家今用其三焉秉觚牘焦思慮以爲論注疏說者百千人
矣攻訐狠怒以辭氣相擊排冒沒者其爲書處則充棟宇
出則汗牛馬或合而隱或乖而顯後之學者窮老盡氣左
視右顧莫得而本則專其所學以訾其所異黨枯竹護朽
骨以至於父子傷夷君臣詆悖者前世多有之甚矣聖人
之難知也有吳郡人陸先生質與其師友天水啖助洎趙
匡能知聖人之旨故春秋之言及是而光明使庸人小童
皆可積學以入聖人之道傳聖人之教是其德豈不侈大

經義考 卷一百七十六
一矣哉先生字某既讀書得制作之本而獲其師友於是合古今散同異聯之以言累之以文蓋講道者二十年書而志之者又十餘年其事大備為春秋集注十篇辨疑七篇微旨二篇明章大中發露公器其道以聖人為主以堯舜為的苞羅芻覬膠轄下上而不出於正其法以文武為首以周公為翼揖讓升降好惡喜怒而不過乎物既成以授世之聰明之士使陳而明之故其書出焉而先生為巨儒用是為天子爭臣尚書郎國子博士給事中皇太子侍讀皆得其道刺二州守人知仁永貞年侍東宮言其所學為古君臣圖以獻而道達乎上是歲嗣天子踐阼而埋尊優師儒先生以疾聞臨問加禮某月日終於京師某月日葬於某郡某里嗚呼先生道之存也以書不及施於政道之行也以言不及覩其理門人世儒是以增慟將葬以先生不能文聖人之書通乎後世遂相與諡曰文通先生

崇文總目唐給事中陸淳纂初淳以三家之傳不同故采獲善者參以啖助趙匡之說為集傳春秋又本褒貶之意更為微旨條別二家以朱墨紀其勝否又撫三家得失與經戾者以啖趙之說訂正之為辨疑
程伯子曰陸淳得啖趙而師之講求其學積三十年始大光瑩絕出於諸家外雖未能盡聖作之蘊然其攘異端開正途功亦大矣

晁公武曰啖助字叔佐閩人趙匡字伯修天水人微旨自為序公武嘗學春秋閱古今諸儒之說多矣大抵啖趙以前學者皆專門名家苟有不通寧言經誤其失也固陋淡

經義考 卷一百七十六 十一
趙以後學者喜援經擊傳其或未明則憑私臆決其失也
穿鑿均之失聖人之旨而穿鑿之害為甚啖氏製統例分
別疏通其義趙氏損益多所發揮今纂而合之凡四十篇
陳振孫曰初潤州丹陽主簿趙郡啖助叔佐明春秋傳并
州刺史河東趙匡伯淳質從助及伯淳傳其學助考三傳
舍短取長又集前賢注釋補以己意為集傳集注又撮其
綱例目為統助卒質與其子異繕錄以詣伯淳請損益焉質
隨而纂會之大歷乙卯歲書成質本名淳避憲宗諱改焉
故其書但題陸淳助之學以為左氏叙事雖多解意殊少
公穀傳經密於左氏至趙陸則直謂左氏淺於公穀誣謬
實繁皆孔門後之門人但公穀守經左氏通史其體異爾
邱明夫子以前賢人如史佚遲任之流焚書之後學者見
傳及國語俱題左氏遂引以為邱明且左傳國語文體不
倫序事多乖定非一人所為也蓋左氏廣集諸國之史以
解春秋子弟門人見事迹多不入傳或復不同故各隨國
編之以廣異聞自古豈止一邱明姓左乎按漢儒以來言
春秋者惟宗三傳三傳之外能卓然有見於千載之後者
自啖氏始不可沒也唐志有質集注二十卷今不存然纂
例辨疑中大畧具矣又有微旨二卷未見質梁陸澄七世
孫仕通顯黨王叔文侍憲宗東宮會卒不及貶然則其與
不通春秋之義者相去無幾耳

集傳春秋纂例

唐志十卷

存

淳自述曰啖子所撰統例三卷皆分別條疏通會其義趙子損益多所發揮今故纂而合之有辭義難解者亦隨加注釋兼備載經文於本條之內使學者以類求義昭然易知其三傳義例可取可舍啖趙具已分析亦隨條編附以祛疑滯名春秋集傳纂例凡四十篇分為十卷云

朱臨序曰柳子厚與元次山論春秋書言自得集傳常願掃於陸先生之門及先生為給事中始得執弟子禮未及卒業而先生云亡復有先生墓表謂說春秋者百千其書處則充棟宇出則汗牛馬而無有及其根源者獨先生得啖趙而師承之講述三十年其經始大光瑩乃為先生能文聖人之書通於後世遂與門人世儒相與謚曰文迪先生其見尊於當世如此子厚文章宗匠也以韓退之之賢

猶不肯高以為師獨肯執弟子禮於陸氏前則陸氏之學從可喻也以陸氏之賢復肯執弟子禮於啖趙前則啖趙之蘊又可量也自孔子沒前先生幾千餘年矣後先生又數百年矣卒未有出其書之右者豈非膠於偏見而至然耶兩漢通經者以董仲舒為第一然猶膠於穀梁不克別白餘可知也臨嘗從師學識其大畧復得先生所為書乃益曉發若瞰淵際危而獲梯航力不勉則已勉焉則無高深不濟也惜乎不得人人傳之以速其遠到子厚謂使庸人小童皆可積學以入聖人之道況有明敏勤篤之資者乎近歲取人以通經為尚學者無小大以不通經為恥則此書之傳為時羽翼豈可忽哉

袁桷後序曰近世春秋家立褒貶於字義茫不知盡性之

理按其形模以中有司程式為精巧天理人慾三尺童子
矜矜然猶能言之春秋之學廢矣習三傳者惟文詞是師
左氏盛而公穀廢矣武夷胡氏作傳止於七家唐世傳春
秋者皆廢矣噫士何事春秋哉吾里樓宣獻公晚歲欲明
義例之說時永嘉陳君舉舍人為春秋傳遂序其意而焚
其橐每語後進當以唐陸淳集注纂例清江劉氏傳為下
手予家所藏纂例乃寶章桂公所校號為精善按纂例他
無善本審此書廢已久聞蜀有小字本惜未之見唐志纂
例十卷集注三十卷微旨二卷辨疑七卷予來杭復得微
旨二卷乃皇祐閒汴本聞茗溪直齋陳氏書目咸有之當
搜訪以足此書以假友人得脫灰燼劉氏傳乃先越公居
宥府時岳肅之侍郎所遺家諱咸以絳羅覆其上書當承
為子孫寶俾勿墜

吳萊後序曰自唐世言文者一變而王楊盧駱再變而燕
許三變而韓柳雖其文振八代之弊及見當世經生攻訕
詰治義疏則深敬之太常殷侑新注公羊退之欲為之序
幸得挂名經端以蘄不朽及寄詩盧仝又言其抱遺經束
三傳然仝所著春秋摘微一卷閒見一二未甚為學者輕
重惟子厚答元饒州書恒願掃於陸先生之門執弟子禮
會先生病子厚出邵州竟不克卒業先生蓋河東陸淳元
冲也與子厚同郡且云先生師天水啖助及趙匡知聖人
之旨兼用二帝三王法至先生大備春秋集注纂例辨疑
微旨等書苞羅旁魄轆轤上一出於正於是乎春秋有
啖趙陸氏之學往予北遊京師始從國子學見陸氏纂例

十卷是金泰和閒禮部尚書趙秉文手本太原板行後又得陸氏辨疑七卷微旨二卷而集注久闕自唐世學者說經一本孔氏正義及宋之盛說者或不用正義六經各有新注爭爲一己自見之論而欲求勝於先儒已成之說宋子京傳唐書猶不滿於啖助者豈啖助實有以開之故歟雖然啖趙陸氏未可毀也後之學者自肆於藩籬間域之外口傳耳剽而不難於議經者必引啖趙陸氏以自解是或未之思也夫

柳貫後序曰陸文通先生春秋纂例十卷平陽府所刊本未有識云泰和三年五月十三日秉文置其裝標猶用宋紹聖閒故門狀紙蓋金仕宦家物也延祐三年貫客京師而得之按其中闕七三十一紙從朋友假善本手書完裝

綴成表先生之學其於春秋粹矣春秋言本三家公穀三釋經左主載事由漢立學官師資殊指故時時彈刺以相高言之詭而道之裂也唐啖趙氏作始析同辨異有義有例明三家之要歸示一王之矩則其道粲然矣先生嘗承趙學著其所聞爲書曰纂例微旨辨疑此其一也貫將讀而釋之益求二書不踵爲余有耶蓋私竊喜之按金章宗之十一年改元泰和其三年則癸亥歲也於時北學稱趙閑閑公秉文卽公名知爲趙氏所藏無疑後癸亥七年章宗復土中原瘳於兵又二十五年而金亡矣是書免於灰殘躡滅以萬毀一存於壁藏瓿覆之餘傳閱幾姓幾室而至於余逆而計之亦一百一十六年物也況今無板本豈不尤可珍也哉得書後二年八月廿五日記

春秋辨疑

唐志七卷

存

淳自述曰集傳取舍三傳之義可入條例者於纂例諸篇言之備矣其有隨文解釋非例可舉者恐有疑難故纂啖趙之說著辨疑

朱臨序曰春秋一其經而三家異其傳學者如目多歧茫茫不知適從聖人之境雖勞無到日矣近古固多議其非然出於臆斷學者愈惑以聖人之蘊如彼其深而專斷於一中材之臆其可惑也宜矣唐有陸氏總啖趙之說為纂例為辨疑所得獨多於近古以啖趙之賢而陸氏兼之其得多也亦宜矣考其舐排誣妄別抉潛隱如翦榛莽見坦

夷聖賢之境可直趨而遠到矣纂例雖傳而世不全獨辨疑無遺辭而學春秋者當自辨疑始故予廣其傳慶歷戊子

何喬新曰春秋因三傳而經旨益明者有焉因三傳而經旨反晦者有焉至啖趙陸淳之辨明而後人之學有所據矣

華察後序曰自漢以來言春秋者大抵守三傳而已其能卓然有見於千載之後者自唐啖趙二子始至陸文通乃集合二家之說作纂例及辨疑數十篇其有功於經甚大顧其書今世罕傳余同年陸給事浚明得舊本以示吳邑令汪君君刻之踰年告成而君以考績去矣浚明深於春秋方盛有所論著以續文通之業異時當別有傳之者汪

君名且晉江人嘉靖乙未進士

春秋微旨

唐志二卷 今本三卷

存

淳自序曰傳曰唯天為大唯堯則之韶盡美矣又盡善也武盡美矣未盡善也又曰禹吾無閒然矣推此而言宣尼之心堯舜之心也宣尼之道三王之道也故春秋之文通於禮經者斯皆憲章周典可得而知矣其有事或反經而志協乎道跡雖近義而意實蘊奸或本正而未邪或始非而終是賢智莫能辨彘訓莫能及則表之聖心酌乎皇極是生人以來未有臻斯理也豈但撥亂反正使亂臣賊子知懼而已乎故今掇其微旨總為三卷三傳舊說亦備存

之其義當否則以朱墨為別其有與我同志思見唐虞之風者宜乎齋心極慮於此得端本清源之意而後周流乎二百四十二年褒貶之義使其道貫於靈府其理浹於事物則凡比屋可封重譯而至其猶指諸掌爾宣尼曰如有用我者期月而已可矣豈虛言哉豈虛言哉

柳宗元曰微旨中明鄭人來渝平量力而退告而後絕固先同後異者也今檢此前無與鄭同之文後無與鄭異之據獨疑此一義理甚精而事有不合

經義考卷一百七十六終

陶宗儀曰澁字太冲京兆人貞元中官至左僕射同平章
事封晉國公諡忠肅

按顧著作况撰韓公行狀云賦春秋七篇著通例
六卷與唐志不同

殷氏侑公羊春秋注

佚

韓子答書曰蒙示新注公羊春秋又聞口授指略私心喜
幸願盡傳其學職事羈纏未得繼請此宜在擯而不教者
今令序所著書惠出非望近世公羊學幾絕何氏注外不
見他書聖經賢傳屏而不省要妙之義無自而尋非先生
好之樂之味於衆人之所不味務張而明之其孰能克勤
繆菴若此之至如遂蒙開釋章分句斷其心曉然使序所

注挂名經端自託不腐其又奚辭 又薦狀曰前天德軍
都防禦判官承奉郎試大理評事兼監察御史殷侑兼通
三傳旁及諸經注疏之外自有所得

馮氏伉三傳異同

唐志三卷

佚

舊唐書馮伉本魏州元城人後家京兆大歷初登五經秀
才科建中四年又登博學三史科為給事中充皇太子及
諸王侍讀著三傳異同三卷順宗即位拜尚書兵部侍郎
改國子祭酒

唐會要元和四年四月給事中馮伉著三傳異同三卷

施氏士丐春秋傳

佚

新唐書士丐吳人大歷時助匡質以春秋士丐以詩仲子陵袁彞韋彤韋蒞以禮蔡廣成以易强蒙以論語皆自名其學而士丐兼善左氏春秋以二經教授由四門助教為博士撰春秋傳未甚傳後文宗喜經術宰相李石因言士丐春秋可讀帝曰朕見之矣穿鑿之學徒為異同學者如浚井得美水而已不必勞苦旁求然後為得邪

按柳子厚道州文宣王廟記有春秋師晉陵蔣堅雖未有傳書而唐人之說經者寡附識於此

樊氏宗師春秋集傳

唐志十五卷

佚

韓愈作墓志曰紹述以金部郎中出為絳州刺史徵拜左司郎中又出刺絳州為諫議大夫

計敏夫曰宗師字紹述襄陽節度使澤之子

盧氏全春秋摘微

通考四卷中興書目一卷

佚

中興書目盧全春秋摘微一卷十二公凡七十六事

許顛曰玉川子春秋傳僕家舊有之辭簡而遠得聖人之意為多

晁公武曰盧全春秋摘微四卷其解經不用傳然旨意甚疎韓愈謂春秋三傳束高閣獨抱遺經究終始蓋實錄也祖無擇得之於金陵崇文總目所不載

李燾曰全治春秋不以傳害經最為韓愈所稱今觀其書亦未能度越諸子不知愈所稱果何等義也舊聞全解惠公仲子曰聖辭也而此乃無之疑亦多所亡逸云

劉氏軻三傳指要

唐志十五卷

佚

軻自序曰先儒以春秋之有三傳若天之有三光然則春秋蓋聖人之文乎聖人之文天也天其少變乎故詩有變風易有變體春秋有變例變之為義也非介然溫習之所至曠乎其粹者也軻嘗病先儒各固所習互相矛盾學者準裁無所豈先聖後經以闢後生者邪抑守文持論敗潰失據者之過邪次又病今之學者涉流而迷源捨經以

習傳撫其言而不知其所以言此所謂去經緯而從組纊者矣既傳生於經亦所以緯於經也三家者蓋同門而異戶庸得不要其終以會其歸乎愚誠顓蒙敢會三家必當之言列於經下撰成十五卷目之曰三傳指要冀始涉者開卷有以見聖賢之心焉俾左氏富而不誣公羊裁而不俗穀梁清而不短幸是非殆乎息矣庶儒道君子有以相期於孔氏之門 又自述曰貞元中軻僅能執經從師元和初方結廬於廬山之陽農圃餘隙積書牕下日與古人磨礱滌心歲月悠久寢成書癖故有三傳指要十五卷十代名臣議十卷翼孟子三卷雖不能傳於時其於兩曜無私之燭不為隳棄矣 又曰予抵羅浮始得師於壽春楊生生以傳書為道者也三代聖王死其道盡留於春秋

春秋之道生以不下牀而求之不失其指每問一卷講一經說一傳疑周公孔子左邱明公羊高穀梁赤若迴環在坐似假生之口以達其心也元和初下羅浮抵匡廬匡廬有隱士茅君語經之文歷歷如指掌予又從而明之忘其愚瞽有三傳指要

王定保曰軻慕孟軻為人故以名焉少為僧止於豫章高安之南果園復求黃老之術隱於廬山既而進士登第文章與韓柳齊名

計敏夫曰軻字希仁元和末登進士第卒於洛州刺史與吳武陵並以史才入史館

徐氏彥春秋公羊傳疏

通考三十卷

存

崇文總目不著撰人名氏援證淺局出於近世或云徐彥撰皇朝邢昺等奉詔是正始令太學傳授以補春秋三家之旨

晁公武曰其書以何氏三科九旨為宗本其說曰何氏之意三科九旨正是一事爾總而言之謂之三科析而言之謂之九旨新周故宋以春秋當新王此一科三旨也所見異辭所聞異辭所傳聞異辭此二科六旨也內其國而外諸夏內諸夏而外夷狄此三科九旨也

陳振孫曰廣川藏書志云世傳徐彥不知何代意其在貞元長慶後也

韋氏表微春秋三傳總例

唐志二十卷

佚

計敏夫曰表微字子明中書舍人敬宗嘗語左右欲相之
新唐書表微敬宗時為翰林學士遷中書舍人尤好春秋
病諸儒執一槩是非紛然著三傳總例全會經趣

許氏康佐等集左氏傳

唐志三十卷 國史補作六十卷

佚

實錄太和九年四月許康佐進纂集左氏傳三十卷五月
以御集左氏列國經傳三十卷宣付史館

唐會要太和九年五月御集春秋左氏列國經傳三十卷
新唐書許康佐貞元中舉進士宏辭為翰林侍講學士遷

禮部尚書

李肇曰詳康佐進新注春秋列國經傳六十卷上問闈弒
吳子餘祭事康佐託以春秋義奧臣窮究未精不敢容易
解陳後上以問李仲言仲言乃精為上言之上曰朕左右
刑臣多矣餘祭之禍安得不慮仲言曰陛下留意於未萌
臣願遵聖謀

高氏重春秋纂要

唐志四十卷

佚

新唐書重字文明士廉五代孫文宗時翰林侍講學士帝
好左氏春秋命重分諸國各為書別名經傳略要歷國子
祭酒

李氏瑾 春秋指掌

唐志十五卷

佚

崇文總目春秋指掌唐試左武衛兵曹李瑾撰瑾集諸家之說為序義凡例各一篇抄孔穎達正義為五篇采摭餘條為碎玉一篇集先儒異同辨正得失為三篇取劉炫規過申證其義為三篇大抵專依杜氏之學以為說

李燾曰其第一卷新編目錄多取杜氏釋例及陸氏纂例瑾所自著無幾而序義以下十四卷但分門抄錄孔穎達左氏正義皆非瑾所自著也學者第觀正義及二例則此書可無且瑾之意特欲以備科試應猝之用耳初不為經說也其名宜曰左氏傳指掌不當專繫春秋本朝王堯臣

崇文總目及李倣圖書志皆以先儒異同規過序例等篇為瑾筆削蓋誤矣寫本或譌舛復用正義刪修之乃可讀惟篇首數序瑾所自著者既無參考亦不敢以意改定姑仍其誤云

陸氏希聲 春秋通例

唐志三卷

佚

崇文總目唐陸希聲撰因三家之例裁正其冗以通春秋之旨

張氏傑 春秋圖

唐志五卷

佚

經義考 卷一百七十一
崇文總目唐張傑撰以春秋所載車服器用都城并邑之制績而表之

春秋指元 宋志作指掌圖

唐志十卷 宋志二卷

佚

崇文總目唐張傑撰摘左氏傳文申釋其義

裴氏安時左氏釋疑

唐志七卷

佚

新唐書注字適之大中江陵少尹

第五氏泰左傳事類

唐志二十卷

佚

新唐書注字伯通青州益都人咸通鄂州文學

成氏公穀總例

唐志十卷

佚

新唐書注字又字咸通山陽令

黃氏敬密春秋圖

一卷

佚

中興書目春秋圖一卷唐會昌中黃敬密撰

王應麟曰國史志作春秋兩霸列國指要圖因序有管霸

楚霸之語

郭氏翔春秋義鑑

唐志三十卷

佚

皮氏日休春秋決疑

十篇

存

晁公武曰日休字襲美一字逸少襄陽人隱鹿門山自號醉吟先生咸通八年登進士第為著作佐郎太常博士乾符喪亂東出關為毘陵副使陷巢賊中賊遣為讖文疑其譏已遂害之

陸游曰該聞錄言皮日休陷黃巢為翰林學士巢敗被誅今唐書取其事按尹師魯作大理寺丞皮子良墓志稱會雅日休避廣明之難徙籍會稽依錢氏官太常博士贈禮部尚書祖光業為吳越丞相父琛為元帥府判官三世皆以文雄江東據此則日休未嘗陷賊為其翰林學士被誅也光業見吳越備史頗詳孫仲容在仁廟時仕亦通顯乃知小說謬妄無所不有師魯文章傳世且剛直有守非欺後世者可信不疑也故予表而出之為襲美雪謗于泉下

裴氏光輔春秋機要賦

宋志一卷

佚

孫氏郃春秋無賢臣論

一卷

存

王應麟曰孫郃論春秋無賢臣蓋諸侯不知有王其臣不能正君以尊王室此孟子所以卑管晏也

浙江志孫郃奉化人唐末為左拾遺朱温篡唐著春秋無賢臣論即脫冠裳服布衣超然肥遯養晦林泉著書紀年悉用甲子以示不臣之義

李氏象續春秋機要賦

宋志一卷

佚

王氏鄒彥春秋蒙求

宋志五卷

佚

崔氏表春秋世本圖

宋志一卷

佚

□氏玉霄春秋括囊賦集注

宋志一卷

佚

楊氏蘊春秋公子譜

宋志一卷

佚

程端學曰蘊字藏機

春秋年表

宋志一卷

存

岳珂曰春秋年表三朝藝文志不載作者名今諸本或闕
號名或紊年月參之經傳多有舛錯不無刊寫之誤如諸
國君繼立有篡奪者表止書某立今增入諸國君有弑殺
表例書某卒今改定諸國君卒或年與月誤或稱某公子
若弟與兄誤今考注疏刊正諸國君卒與立皆書惟魯闕
今依經傳添補如鄭莊公卒表書厲公突立突出奔按經
傳昭公立宋人執祭仲以厲公歸而立之昭公奔衛如莒
著邱公去疾表書又名郊公按傳著邱公卒郊公不感注
郊公著邱公子如楚莊王旅誤為旋晉景公孺誤為孺若
此類不可枚舉皆以經傳正之史記年表書事今表止書
繼立循舊不敢增 又曰按館閣書目元豐中楊彥齡撰
二卷紹興中環中撰一卷今本一卷與紹興中本及藝文

志所載者同

張氏暄 春秋龜鑑圖

宋志一卷

佚

王應麟曰自魯周迄陳蔡載其名氏

經義考卷一百七十七終

弟子嘉興陳廷先覆校

水香其地...

蘇美共參一百七十五...

是亦風曰自魯風...

舟

宋六一參

蘇列...

...

